

Udalbiltzak bide berriak irekiko dituela diote Bilbo sartzea onartu zuten taldeek

EAJ, EH, ICV eta EAko udal taldeak onartutako mozioaz mintzatu ziren atzo

Montse Arregi / Bilbo

Bilboko Udalak Udalbiltzako partaide izateko asteon hartutako erabakiaz mintzatu ziren atzo EAJ, EH, EA eta ICVko udal taldeetako ordezkariak. Erakunde nazionalak «bide berriak» irekiko dituela eta, Bilbok bertan egin dezakeen ekarpena nabarmendu zuten. Bestalde, ez zuten zehaztu alderdien arteko akordio horrek udal gobernuan islarik izango ote duen.

AGERRALDI bateratua egin zuten atzo Bilbon bertoko udaleko EAJ, EH, EA eta ICV taldeetako zinegotzi eta bozeramaileek. Joan den ostegunean Bilboko udalbatzak Udalbiltzarekiko atxikimendua onartu zuen, aipatutako taldeen botoei esker onartutako mozioaren bitartez. Udalbiltzak «bide berria» ireki duela eta «nahi duenarentzat irekita» dagoela azpimarratu zuten udal ordezkariak.

Juanjo Olabarria EAJko ordezkariaren arabera, «bidea ibiliz egiten da», eta Udalbiltzak jorratu nahi duen bidea «bertatik joan nahi duten guztientzako irekita» dagoela adierazi zuen.

EHko bozeramaile Lander Etxebarriaren esanetan, «konponbide berriak» bideratuko dituen erakundea da Udalbiltza, «erakunde eraiki-



TXEMA FERNANDEZ / EFE

Uribarri, Olabarria, Etxebarria eta Gorordo, atzo, elkarrekin egindako agerpena hasi aurretik.

tzailea, non gero eta euskal udal gehiago biltzen ari den». Bilboko udaleko gutxiengoak «gezurrekin iritzi publikoa nahastu» nahi duela salatu zuen. Bilbon hartutako erabakiaz EHn «harro» daudela berretsi zuen, Bilbotik Udalbiltzari bultzada emango zaiolakoan.

ICVko Jose Maria Gorordok «Bilbo arlo ezberdinetan aitzindari» izan dela gogorazi zuen, eta oraingoan ere Udalbiltzan hala izango dela deritzo. «Bilbotik Euskal Herriaren baketzean parte hartu nahi dugu».

Jose Manuel Uribarri EAko kideak «bake bidean aurrerapausotzat» jo zuen Bilbok Udalbiltzari adierazitako atxikimendua. Udalbiltza erakundea edota Lizarra-Garaziko Akordioa «ekarpenak egin nahi dituenarentzat irekita» daudela berretsi zuen.

Udal gobernuan izan dezakeen islas

EAJ- EA, EH eta ICVko mozio hori onartzeko egin duten indar batuketak aurreranzeko udal gobernurako itun

bilakatzeko aukerarik ote dagoen ez zuten zehaztu alderdikideek atzoko agerraldian. Olabarria jeltzalearen iritziz, «akordio honek gehiengo bat du, eta beste batzuk bestelakoak izan ditzakete. Azken finean jezarri eta berba egiten konpon-tzen dira gauzak. Hitz egin nahi ez dutenek akordiorik nahi ez dutelako izango da».

Gorordoren ustez udalaren gobernabilitaterako «gutxieneko adostasunak» bilatu behar dira, Udalbiltzaren inguruan lortutakoaz desberdinak izan arren.

Lizarra-Garaziko alderdien ordezkari bat Venezuelara abiatuko da gaur

■ Euskal kolektibitateak gonbidatu ditu, Hitzarmenaren berri jasotzeko

Erredakzioa / Donostia

LIZARRA-GARAZI-KO Hitzarmena sinatu zuten alderdietako ordezkari batek bisita hasiko du gaur Venezuelan, herrialde horretako hainbat euskal taldek gonbidatuta. EAJko Markel Olanok, EAko Rafa Larreinak, EHko Mikel Kortak eta ABko Mertxe Kolinak osatzen dute ordezkari taldea hori.

Zortzi egunez izango dira han, eta Caracas, Valencia eta Puerto Lacruzeko euskal etxeen inguruan biltzen den euskal kolektibitatearekin eta unibertsitateko ordezkariekin elkartuko dira. Lizarra-Garaziko Akordioa azaltzea eta, oro har, Euskal Herriko egoeraren berri ematea du helburu bisitak.

Caracaeko Euskal Etxeak, EAJren Venezuelako Batzordeak, Euskal Errefuxiatuen Kolektiboak eta Euskal Herriko Lagunen Venezuelako Elkarteak egin zieten gonbita. Talde horiek agiri bateratu bat kaleratu zuten Lizarra-Garaziko Akordioarekin bat egiteko eta hura zabal-tzeko konpromisoa hartzeko.

Trebiño Araban sartzeko eskatu dute ehunka lagunek

■ Kontzentrazioa egin zuten, UDAk deituta

Erredakzioa / Gasteiz

EHUNKA pertsona bildu ziren atzo Gasteizko Diputazioaren aurrean Trebiño Araba dela aldarrikatzeko. UDA elkarteak deitu zuen kontzentrazioa, eta, besteak beste, aprobetxatu zuen aldarrikatzeko erakundeek «gehiago» egin behar dutela trebiñar gehienek nahi duten helburua lortzeko.

Trebiñok horrela ezin duela jarraitu adierazten zuen manifestazioaren leloak. *Trebiño orain eta aitzakiarik gabe* zioen Diputazioaren

eskaileretan bildutakoen pankartak. Haren atzean zeuden Trebiñoko eta Argantzungo alkateak eta alderdi abertzaleen ordezkariak; besteak beste, Minkel Mintegi eta Gorka Knorr EAko kideak eta Santi Hernando eta Iñaki Usategi EHkoak.

Kontzentrazioaren bidez, halaber, zerbitzuak aldarrikatu zituzten herritarrentzat. Osasunean eta Hezkuntzan bereziki nahi dituzte zerbitzuak, eta hori Arabako eta Burgosko agintariak hitzartu beharko lukete, UDAREN iritziz.



EDORTA OTSOA

UDAK antolatuta atzo Gasteizen eginiko kontzentrazioa.